

四庫全書

集部

欽定四庫全書

集部

梁谿集卷二十一至  
四

詳校官庶吉士臣張溥

侍讀臣孫球覆勘

總校官知縣臣楊懋珩

校對官中書臣潘奕雋

謄錄監生臣陳太初

欽定四庫全書

梁谿集卷二十一

宋 李綱 撰

詩十七

在湖外作  
五十五首

胡笳十八拍

重陽日醉中戲集子美句二首

夜寢夢遊泗上觀重建僧伽塔

次韻淵明讀山海經

和淵明時運詩念梁谿故居

梁谿八詠八首

和淵明歸田園居六篇

小雨

客餉新橙有感

偶得雙鯉付厨作鱠以薦一觴

和淵明擬古九首

和淵明停雲篇

和淵明榮木篇

和歸鳥篇

和勸農篇

和淵明遊斜川

和淵明已酉歲九月九日之作

胡笳十八拍

昔蔡琰作胡笳十八拍後多倣之者至王介甫集古人  
詩句為之辭尤麗縝悽婉能道其情致過於創作然此  
特一女子之故耳靖康之事可為萬世悲暇日效其體

集句聊以寫無窮之哀云

第一拍

四海十年不解兵  
朝降夕叛幽薊城  
殺氣南行動天軸  
犬戎也復臨咸京  
鐵馬長鳴不知數  
寇騎憑陵雜風雨  
自是君王未備知  
一生長恨奈何許

第二拍

黑雲壓城城欲摧  
赤日照耀從西來  
強箭如沙射金甲  
甲光向日金鱗開  
昏昏闇闇閉氛祲  
六龍寒急光徘徊

黃昏寇騎塵滿城百年興廢吁可哀

第三拍

千乘萬騎出咸陽百官跣足隨天王  
翠華搖搖行復止黃塵暗天道路長  
金盤玉筋無消息色難腥腐食風香  
晚將末契託年少遂令再往之計墮渺茫

第四拍

筋骸精堅更馬驕猛蛟突獸紛騰逃  
春寒野陰風景暮塵埃不見咸陽橋  
中原格鬪且未歸隴山蕭瑟秋雲高

安得壯士兮守四方一豁明主正鬱陶

第五拍

漢家離宮三十六緩歌慢舞凝絲竹鐵騎突出刀鎗鳴  
驚破霓裳羽衣曲明眸皓齒今何在細柳青蒲為誰綠  
桃花依舊笑春風風動落花紅蔌蔌

第六拍

憶昔霓旌下南苑攀條弄芳畏晚晚只今飄泊干戈際  
寒盡春生洛陽殿梨園弟子散如煙白馬將軍若雷電



城上春雲覆苑牆  
回首何時復來見

第七拍

星宮之君醉瓊漿  
矯如羣帝驂  
龍翔龍池十日飛霹靂  
齊言此夕樂未央  
玄圃滄州莽空濶  
羽人稀少不在傷  
深山窮谷不可處  
託身白雲歸故鄉

第八拍

黃塵散漫風蕭索  
殺氣森森到幽朔  
五十年間似反掌  
瑤池侍臣已冥寞  
千崖無人萬壑靜  
旌旗無光日色薄

萬事反覆何所無注目寒江倚山閣

第九拍

五陵佳氣無時無龍種自與常人殊一去紫臺連朔漠  
骨肉滿眼身羈孤金鞭斷折九馬死邂逅豈即非良圖  
人間俯仰成今古豈憶當殿羣臣趨

第十拍

人生失意無南北去住彼此無消息黃蒿古城雲不開  
時復看雲淚橫臆猛將腰間大羽箭一箭正墜雙飛翮

汝休枉殺南飛鴻  
道路只今多擁隔

第十一拍

天子不在咸陽宮  
翠華拂天來向東  
江間波浪兼天湧  
中有雲氣隨飛龍  
干戈兵革闕未止  
無復射蛟江水中  
江邊老人錯料事  
時危慘澹來悲風

第十二拍

漁陽突騎獵青丘  
天馬跋足隨犂牛  
幕前生致九青兕  
苦寒贈我青羔裘  
萬里飛蓬映天過  
歲云暮矣增離憂

如今正南看北斗長安不見使人愁

第十三拍

聖朝尚飛戰鬪塵推鼓鳴鐘天下聞岸上荒村盡豺虎  
衣冠南渡多崩奔何時鑄戟作農器欲傾東海洗乾坤  
干戈未定失壯士舊事無人可共論

第十四拍

大麥乾枯小麥黃問誰腰鎌狄與羌漢家戰士三十萬  
此豈有意仍騰驤安得突騎只五千長驅敵人盡走藏

近靜潼關掃螻蟻為留猛士守未央

第十五拍

我生之後漢祀哀經濟實藉英雄姿遙拱北辰纏寇盜  
杳杳南國多旌旗傷心不忍問耆舊垂老惡聞戰鼓悲  
中夜起坐萬感集誰家搗練風淒淒

第十六拍

雨聲颼颼催早寒歲暮窮陰耿未已燕山雪花大如席  
寒刮肌膚北風利戰罷歸來血洗箭陣前部曲終日死

漫漫玄天叫不聞  
日夜更望官軍至

第十七拍

時危始識不世材  
成王功大心轉小  
豺狼塞路人斷絕  
一門骨肉散百草  
江頭宮殿鎖千門  
不知明月為誰好  
何時眼前突兀見  
此屋鷄鳴問寢龍  
樓曉

第十八拍

風塵瀕洞昏王室  
咫尺波濤永相失  
漂然時危一老翁  
灑血江漢長哀笳  
一會兮琴一拍青  
山落日江湖白

身欲奮飛病在牀此心炯炯君應識

重陽日醉中戲集子美句遣興

青山落日江湖白飄零已是滄浪客老去悲秋強自寬  
青藥重陽不堪摘東流江水西飛鷺傳語風光共流轉  
急觴為緩憂心擣休語艱難尚酣戰聖朝尚飛戰鬪塵  
何用浮名絆此身時復看雲淚橫臆晚來幽獨恐傷神  
籬邊老却陶潛菊開花無數黃金錢且看欲盡花經眼  
飲如長鯨吸百川只今漂泊干戈際方外酒徒稀醉眠

腐儒哀晚謬通籍杜曲幸有桑麻田故畦遺穗已蕩盡  
中原君臣豺虎遑安得務農息戰鬪武陵欲問桃花源  
夜寢夢遊泗上觀重建僧伽塔纔兩層塔以今春  
同普照王寺焚蕩殆盡豈人士有意再來此土  
乎覺而賦詩以紀之

至人於世何所求隨緣應物初不留緣合則應散則休  
起滅幻境如浮漚僧伽塔踞淮泗流火焚水轉歲幾周  
國家崇奉德更優雍熙所建無與儔層層金碧巧雕鏤



鑿石作址蟠龍虬簷間寶鈴韻琳璆勢挿霄漢神為謀  
瑞光煥發垂珠旒青天白日爛不收崔魏高殿聳飛樓  
千楹萬柱烟雲浮誰知興廢相綢繆鐵馬馳突橫戈矛  
四方羣盜起如蝨付以一炬成荒丘慈航濟物衆所庥  
捨我去矣真可憂昨宵夢到淮上洲宰堵再造工方鳩  
千章巨木回萬牛此豈有意重來不塔成大士還舊遊  
更扶休運三千秋

次韻淵明讀山海經

清霜落喬木翠色頽以踈而我正臥病蕭然寓精廬起  
坐無與歡散帙聊觀書心遊千載間超詣非舟車更酌  
一杯酒薦此果與蔬緬懷陶淵明雅志與我俱還看枕  
間屏乃是歸來圖古人不予欺歲暮將何如

余築室梁谿之上三年而後成手植花木甚衆遭  
值世故未嘗得安居其間歲暮羈旅慨然念之  
因和淵明時運詩以見意

卜宅梁谿成非一朝面山枕岡遠市近郊脩竹茂林翠

連烟霄松桂吐香杞菊長苗旁臨清流塵纓可濯小閣  
嗇然九峯遠矚豈無華宇於我自足兄弟墳簾於焉相  
樂春服既成如浴乎沂風乎舞雩詠嘯而歸自我離羣  
潜然涕揮拊心念咎電往莫追今夕何夕夢還我廬稚  
子候門兩髮髭如携幼入室濁酒傾壺慨我寤歎誰復  
如余

梁谿八詠

中隱堂

不在山林不市朝且將圖史當漁樵桂花想見秋來盛  
香滿西風取次飄

棣華堂

兄弟埙篪人所推棣華堂裏遠相思艱難世路風霜急  
正是鵲鴿原上時

文會堂

親賓情話款衡門把酒揮毫氣吐雲何日寬思返三徑  
一樽重與細論文

九峯閣

小閣崢嶸面九峯  
暮天秀出碧芙蓉  
孔明本有躬耕志  
却合歸來看臥龍

舫齋

畫舫臨流四面通  
綠窓面面有清風  
年來始會虛舟意  
正在江湖波浪中

怡亭

縹緲危亭枕曲池  
紅粧翠羽自參差  
晚涼小飲誰同醉

定把圓荷當屈卮

心遠亭

境寂心閑物物宜  
倚欄更看嶺雲飛  
曉猿夜鶴應思我  
正好歸時猶未歸

濯纓亭

畫棟飛簷俯碧流  
何時歸去艤扁舟  
不須更把塵纓濯  
直取冠裳裂卽休

余既居梁谿有田園可樂又平生愛錢塘湖山之

勝常欲治書室湖上買小舟浮家泛宅往來茗  
雪間以終其餘年此素志也自己巳歲為世網  
所嬰此事便廢而浙郡相繼兵叛盜起景物佳  
處鞠為灰燼今余又羈旅湖外邈無歸期乃知  
世間不如人意者十常八九豈不信然因和陶  
淵明歸田園居六篇以自慰云

東吳信佳地碧溪繞青山我居枕溪傍卜築亦有年山  
空乳滿腹迸出蒼龍淵餘波滑無聲下灌負郭田秋風

粳稻香落照孤鴻間黃鷄與紫蟹日滿樽俎前酌酒燕  
賓友揮毫散雲烟常謂享此樂可以終華顛豈知縈世  
故擾擾不得閒側身念吾廬悵望情依然

一為世網嬰未遂稅塵鞅驅馳途路間空積溪山想我  
居今若何歲月忽已往三徑將荒蕪松菊日應長泛舟  
茗雪間吾意誠已廣時危方艱難長恐墮渺莽

人生不滿百七十亦云稀吾年甫知命飄泊猶未歸江  
湖歲將晏霜露霑人衣滄洲惠詢約坐恐此志違



平生愛武林湖山良可娛連年兵火作景物成丘墟常  
願買一廛築室湖上居開軒蒼翠間手植松千株浮家  
同志和來往得自如樽中酒不空樂死不願餘那知今  
乃爾此懷坐成虛已矣何所道萬法皆本無

每愛賀知章勅賜鑑湖曲而我不須多數頃亦已足世  
故俛仰間反覆若碁局良辰逝莫留勝遊當秉燭明月  
照芳樽坐待東方旭

我昔居梁谿夢斷長安陌倒冠與落佩志氣良自適花

前飲春朝月下舞秋夕自從喪亂來光景駒過隙無復  
舊情懷擾擾為物役寤寐憂他人自麻初不續長嘯休  
去來勞生亦何益

小雨

小雨廉纖作曉寒繞簷疎竹正檀欒窮愁著論墨長濕  
磊塊澆胃杯未乾莊舄顯時猶越語鍾儀繫處亦南冠  
百憂萬感無時了更賦新詩強自寬

客餉新橙有感

湖外新橙也自黃故人相贈解包香擣齏正鱠雙魚美  
薦酒聊持一瓣嘗湛峴舊栽千樹橘洞庭初落蒲林霜  
木奴供給何須道悵望東吳雲水鄉

偶得雙鯉付厨作鱠以薦一觴

雙鯉從來兩穴東霜刀縷切膾花紅銀絲藿葉自爭巧  
玉筋金盤未覺空德飽姜侯情已重詩成杜老志應同  
秋風笠澤鱸尤美何日扁舟入手中

和淵明擬古九首

風霜已搖落天氣猶清和聊持一樽酒自飲還自歌朝  
心愁不開暮髮白已多朱顏與綠鬢若霜萎荷流年  
不我與不飲如老何

驚心如傷禽哀質若凋柳百年能幾時處世安得久寤  
寐若有失哀我泉下友平生不識面况復銜杯酒知心  
乃如斯此意豈可負管鮑貧時交於古亦云厚范張久  
已亡今人那復有

階禍初甚微智者能要終被髮祭於野卒有知其戎時

平足諛佞世亂多姦雄坐令夷亂華誕謾本晉風重華  
不再作吾道何其窮已矣可奈何此生如夢中

棄置帝王宅乃欲保一隅一隅豈易保巨盜連荆舒眷  
言浙江西有我先人廬兵火偶不到聚族於焉居羈束  
未得歸田園日將蕪江邊畏羣盜歲暮當何如

立國有常理恩威撫要荒胡為決藩籬坐使寇及堂憑  
高寓遠目中原氣蒼茫昔時冠蓋地今日爭戰場玉輦  
幸朔漠金輓出北邙腐儒獻奇策碧衣坐稱昂儻無濟

時畧何以綏四方蒼生未蘇息慨歎情內傷

吾憐靖節翁食少衣不完棄祿緣束帶貴身遂拋冠簞  
瓢有餘樂不慙陋巷顏成趣園日涉息交戶常關返觀  
富與貴一塵集毫端素琴久無絃適意自可彈處心慕  
黔婁抗志同伯鸞斯人骨已朽霜霰時方寒

一作雲松  
枝幹老不

懼風  
霜寒

古今紛變態茲道長若茲處世或窮達否泰各有時豈  
無磨與涅貴在不磷淄達人乃大觀曲士多致疑所以

古聖賢立此垂世辭慙懃論出處欲使學者思周公尚  
居東仲尼豈余欺愈鈍久乃利艱脆當安之我亦道窮  
者欲賦鴟鴞詩

結髮慕古人絕俗期遠遊如登太山頂志氣小九州古  
今會遷變萬壑無停流向來富貴者纍纍但荒丘漢唐  
已磨滅况復秦與周惟餘節義士可向編簡求

青松生高岡無意斧斤採歲寒霜霰深未覺柯葉改梁  
鴻既適吳管寧亦浮海二子得我心高舉不相待士生

不逢時命矣何所悔

余來湖外家問不通者累月因和淵明停雲篇以

遣懷

上天停雲以陰以雨我之懷矣川路修阻田園將蕪幼  
稚誰撫鴈信來遲鶴立以佇淒其以風零雨其濛自去  
梁谿爰止西江一室蕭然臥于北牕塊獨處此人誰我  
從豈無軒裳誰適為榮人之為人亦以有情亂離瘼矣  
棄家遐征知我如此不如無生今夕何夕鵲媚庭柯載



植其尾迭相鳴和發書占之遠問為多兆而未至懷哉  
若何

霜降木落獨松柏蒼然顏色愈好因和淵明榮木  
篇以見意

采采榮木春華于茲及爾素秋風霜瘁之寒暑代謝榮  
枯有時改柯易葉翩其隕而蒼蒼松柏摧榦蟠根風霜  
雖厲秀色長存君子進德以道為門歲寒時艱節義彌  
敦惟天於余賦此拙陋材不趨新學惟求舊龜勉風夜

其何能富屢冒艱危內省不疚先公有訓豈敢失墜敬  
慎威儀聖言是畏鉏刀雖鈍驚馬希驥一割之功十駕  
而至

和歸鳥篇

翼翼歸鳥爰集于林近萃芳郊遠依煙岑眷言顧之實  
獲我心叢木茂止憇此繁陰翼翼歸鳥翩然翻飛風高  
天闊去將疇依雲路翱翔倦翮思歸矰繳孔多無使患  
遺翼翼歸鳥撫翼徘徊江湖渺茫有懷故棲顧儔嘯侶

鳴聲和諧願言不獲悵然傷懷翼翼歸鳥集于舊條一枝已多豈俟高標歛翰息影好音交交願言終此以休永勞

和勸農篇

天臨下土是生烝民耕食鑿飲乃含其真淳澆樸散巧偽相因誰其還之時惟聖人聖人立政爰重黍稷設命官司職是播植春勤于耕秋乃有穡儲其贏餘荒歲足食瞻彼中原邾邳平陸春日載陽和風肅穆夫耕婦饁

儔類相逐少壯竭力逸此耆宿豈無他圖惟茲永久利  
其耒耜十千維耦帶月荷鋤侵星耘畝崇本抑末孰敢  
游手終年厭殮報則不貴千箱萬倉以副汝冀為酒為  
醴樂此分至仰奉俯畜夫復何愧四體不勤丈人所鄙  
帶經而耕豈廢冠履我思古人希風往軌躬耕南陽無  
使專美

秋雨初霽天高氣清獨遊山間意欣然樂之因和

淵明遊斜川詩以紀其事

歲律忽晚晚我生感行休雨餘秋氣清策杖成獨遊蒼  
蒼松桂合中有清淺流放懷侶樵者忘機狎飛鷗顧我  
踈散姿自合在一丘但恨尚羈束塊處無朋儔獨酌誰  
與共獨歌誰與酬此獨有至樂當有知者不盜賊紛滿  
眼世故端百憂置之且勿道獨樂未易收

後重九半月菊始開因思東坡言菊花開日即重  
陽取酒為之一醉遂和淵明已酉歲九月九日  
之作

地偏菊開晚乃在秋冬交霜中色艷艷肯遜蓬艾凋感  
此節物殊為爾再登高玉觴泛金英舉酒望層霄雲氣  
有佳色此豈瞪發勞世態五陵滅冰炭方凝焦不如醉  
後眠意味真陶陶何論飲而壽且以樂此朝

欽定四庫全書

梁谿集卷二十二

宋 李綱 撰

詩十八

在湖外作  
五十七首

和淵明答龐參軍

叔易得水晶筆格賦詩見意

叔易詩附

次韻叔易四絕

山居四詠四首

山居遣興四首

御畫二軸一馬一兔各一首

仲輔和寄送季弟詩復次韻寄之

王周士以幅素圖萬石巖見示

煨芋

蒸栗

摘鬢間白髮有感

初食金橘

燈花

銅鑪

客有饋玉面狸者

冬日閒居遣興十首

食蟹

食橘

秀容菊



許崧老見和月林堂夜坐詩復次前韻

周元中賦御書驄馬次其韻

送周元中遊黃龍山

題峽江蕭氏遊思賢堂

黃雀

默堂四絕

自鄂渚移居澧陽

翁士特見和山字韻詩兩篇復次前韻寄之

次韻翁士特試谷廉泉見懷之作

戊申冬至日有懷諸弟時赴澧陽

張氏二甥賦詩可喜

得梁谿家書報黃氏女生外孫

得梁谿家問足慰遠懷因和淵明答龐參軍之作  
剥啄叩門梁谿有書發函讀之遠懷以娛長少童稚咸  
安其居森然滿前如返我廬一書可寶萬金非珍契闊  
寤歎乃茲相親鵲不吾欺鳴以告人載詢僕夫以及其  
鄰嗟我諸季鷄鳴孜孜左圖右書中心好之山川修阻

貽我以詩三復佳句實慰所思翩翩鴻鴈暫聚亟分豈  
無他人非我所欣清宵步月白日看雲無遐邇心好音  
數聞昔我之來鵲鳩將鳴今也歲晏霜露載零言念沙  
漠有懷玉京終夕不寐羣生未寧悵望東吳慨臨西風  
願化獨鶴烟霄可冲敬慎威儀惟以令終黃髮為期其  
愛爾躬

叔易得水晶筆格賦詩見寄因次其韻頃與叔易  
奕而勝得其銅獸鑪製度甚古攜行常置几案

間今此格宜以贈遠與爐為伴故卒章及之

武夫惡文士每見輒不喜排紛須大劍安用毛錐子豈  
知管城翁功閎著青史義之筆陣圖善戰固其理賢哉  
小謫仙好古良有以獨憐中書君飄泊無定止誰將素  
琅玕實此錦綉筐瑤山列羣峯玉筍連厥趾置君丘壑  
間未覺形神渾光聯玉蟾蜍含凍其隼几玲瓏小九華  
一一名可指作詩寄遠人為洗塵埃耳秀句與珍玩清  
絕那可擬燦然珠玉間尚許蕙葭倚我生墮江湖放浪

謝簪縫塵泓久寂寞禿穎亦頽委當為千里贈勿念一  
枰恥配此古獸爐縹緲孤煙起

一作香雲起

### 叔易詩

我居豈無朋席上多可喜頽然秀而莊尚友管城子若  
人東廊喬策勲在圖史勤勞則云多未省相料理提攜  
間遊息棄置或未以坐令大雅士反側靡所止公乎獨  
何為璆琳璨箱篚贈我羣玉峯聯緜蓋同趾清水出遠  
壑炯不受纖滓佳哉中書君隱此冰玉几銅山豈不好

巖道或遭指枕石今枕流便可當洗耳我微思公癖玩  
物詎應擬所欣賢友生相與時徙倚煌煌明光宮簪珥  
逮冠緹何如山中人高卧看雲委勿嗟秦少恩當念默  
泄恥盡心竟奚為置此一笑起

次韻叔易四絕句

落日西風粳稻香畦間散策月荒涼誰知萬頃黃雲熟  
行客初看挿綠秧

笑續離騷賦遠遊霜寒雲夢杳然秋何時把釣梁谿上

醉嚼蟹螯餘罷休

身閒且作地行仙  
謫墮江湖豈偶然  
幸有惠連詩句好  
不妨青紙寄新篇

初寒一醉萬家春  
尚有陶翁漉酒巾  
五牧潘葑新釀熟  
開樽應憶未歸人

山居四詠

紙帳

潔如白疊軟於氍毹  
浪龜紋細結聯雅  
稱獨歌班竹枕

最宜深炷紫沉煙斜風細雨吳綾暖萬草千花蜀錦鮮  
何似禪房褚夫子日高覆幃擁衾眠

竹枕

此君勁節傲風霜高卧尤宜逐客牀雅製頗同琴可薦  
瑩膚端與玉爭涼欲憑幻境成佳夢故使通中貯祕方  
富貴功名本何有覺來猶未熟黃梁

地爐

小寒聊試地為爐端為先生病更癯炙背願馳金騾裹



藉床初展錦氍毹聳肩傍壁詩十字爆栗燒氍毹酒一壺  
便擬慙懃事丹竈朝晡稱火較鎚銖

一作鎚銖稱  
火候朝晡

### 石鈹

誰剗蒼玉事煎烹形製深寬潔且輕感沸未看浮蟹眼  
颼颼先聽起松聲龍頭豕腹徒譙誚鐵溢銅腥費挈擎  
多病文園苦消渴煮泉淪茗正須卿

### 山居遣興四首

偶向忙時乞得身山居岑寂絕比鄰雀羅可設門無客

酒盞頻傾句有神  
隱背時煩木童子伴眠  
猶有竹夫人  
蒼生未定郊多壘  
敢向長沮與問津

三黜先生髮半華  
但將筆墨作生涯  
已知晏食能勝肉

更覺安行可當車  
月好只愁無竹葉  
風來自與掃巖花

江邊盜賊休窺伺  
不是宣和宰相家

宣和以前宰相家  
賜厚甚兩年來鮮

有不惟盜賊者平日所蓄皆為巨盜積余靖康初在樞  
庭半年建炎初在相府兩月既無泛恩俸祿亦減又多  
不請而再經遠謫行索窶甚然  
亦未嘗遇盜而家獨全故云

秋杪幽居分外清  
傍簷鳥雀自和鳴  
過時黃菊渾無賴

入眼青山獨有情  
酒後暈紅潮  
玉頰吟餘几  
杖殷金聲  
前村野老能  
碁戰時與  
呼來對一枰

沉陰天色半含情  
小院重門晝掩扃  
一枕睡餘香未散  
三甌茶後酒初醒  
山雲舒卷閒中看  
竹雨蕭疎靜處聽  
愁寂最憐霜後菊  
案頭乾死有微馨

趙叔霽運判見示宣和御畫二軸其一馬舉足奮  
迅將起其一兔正面踞地齧草皆絕去筆墨畦  
徑間意態如生精妙入神伏觀歎息感慨因賦

詩二篇以贊揚宸翰且叙小臣悽憤之情云

宣和天廐多清新肉髯汗血皆翔麟  
圉人牽來赤墀下宸筆落紙親傳神  
非行非立非馳逐獨寫騰身前舉足  
展沙奮迅欲嘶風驤首驂驪初噴玉  
流雲飛電五花驄庭前榻上雙真龍  
始知韓幹畫多肉坐使冀北羣皆空  
鑾輿遠狩龍荒外八駿瑤池杳何詣  
空留此馬落人間感憤暗灑累臣涕

右馬

草枯霜落秋風高中山之兔初長毫天姿狡健雅善走  
韓盧宋鵲紛騰逃帝居深沉九重裏何自得此山林意  
枯芳咀嚼如有聲缺口長須聳雙耳宣和天子儲聰明  
天縱將聖尤多能萬機閒暇戲染翰作此東郭髦鬚髻  
黃塵漠漠暗沙磧屬車一去無消息安得壯士東擒胡  
雞鳴問寢還龍德

右兔

仲輔和寄送季弟詩復次韻寄之

塊處江城無與遊  
蘆花楓葉楚天秋  
蕭然霜鬢傷遲暮  
久矣灰心任去留  
道阻每懷千里念  
時危豈為一身憂  
何年棣萼還相映  
醉卧元龍百尺樓

新詩寄遠慰南冠  
墜露遙知飲木蘭  
素愛少游乘下澤  
尚憐子美縛微官  
遭罹貝錦如吾少  
漂泊兵戈見汝難  
華髮比年老兄弟  
相思對案不能餐

王周士以幅素圖萬石巖見示

不須避世向桃源  
自有巖中小洞天  
漱石枕流塵境外

巢雲卧月玉峯前  
高懷肯顧三千石  
福地真同十九泉  
小隱羨君誠得計  
我方憂惱老江邊

煨芋

禪房夜坐腹半飢  
寒爐撥火煨蹲鴟  
凍膚傍煖漸舒暢  
展轉更覺鳴聲悲  
毳衣脫落豐肌滑  
玉軟酥香不勞齧  
芳甘著頰自生津  
多病文園正消渴  
吾生老矣來荆蠻  
得汝聊助癯儒餐  
不學當年鬼谷子  
糞土堆頭拜懶殘

蒸栗

風霜開栗皴孕此頰虬卵嘉哉古所贄飮餌入籩匱累  
纍紫腰菱爛爛火蠶繭甘腴能療病炎帝所編纂幽人  
夜讀書坐對銅檠短颺颺石鼎沸焰焰地爐暖式將瓦  
甑炊剖殼黃玉軟乘飢進五六腹已果然滿吾嘗位將  
相日食萬錢餒荒山啖芋栗自勝太官饈乃知一飽餘  
萬品徒過眼聊持薦杯酒不假玻璃盃憂慨不成眠夜  
寒空展轉

摘鬢間白髮有感



吾生足憂患未老頭已白鬢間垂素絲攬鏡聊一摘星  
星去雖欣種種鮮還感頗愁日增多盡拔復何益追思  
少年時綠髮光且澤森然茂雲松豈謂少堪惜自從多  
病後脫落露廣額蒲柳姿易衰日與風霜迫蕭蕭不勝  
梳擾擾僅盈掬安能上指冠常恐吹墮幘年來涉艱虞  
更復非夙昔奔馳動萬里漂泊繼三謫從橫蹈危機侈  
哆困煩嘔交遊莫援手仇怨惟下石素標宜滿頭斑鬢  
未為逼何年運河車泝補泥丸宅華顛復變鬢去作煙

霞客憔悴楚江濱  
歲晚將何獲

初食金橘

江湖種橘侔洞庭於中小者如龍睛  
珊瑚枝幹碧玉葉結實璀璨羅繁星  
客持贈我意已重貯以翠籠尤晶熒  
氣含風露更高潔色著霜日微紅青  
勻圓入手訝磊砢甘酸流頰淒芳馨  
金丸玉齒乍破碎中有沆瀣凝清冰  
厥包憶昔貢宮闕瀟湘遠物來天局  
爭新效美不論直萬顆坐覺千金輕  
美人轉賜入懷袖歸來分餉同瑤瓊

只今八駿杳安在此物亦爾無光精天涯相見兩寂寞  
敢以陋質傷飄零舉觴為爾成一醉醉中不省居蠻荆

燈花

獨坐對黃卷夜寒燈自花紅深誰種時枝嫋忽萌芽酒  
綠正盈爵客愁方念家慙懃報遠信賴爾慰年華

光鋐長吐焰頃刻遽開花玉粒乍排粟金英初擢芽謫  
官那有喜旅食未還家對爾翻惆悵飄蕭雙鬢華

余來湖外臨行與叔易奕而勝得銅爐製作精古

愛之常置几案間感物懷人為賦此詩

古製精巧後莫擬何年著此形模偉狀為神獸踐脩虺  
蜿蜒脊脅莫厭趾犀兕一角昂其鼻胷腹空洞口哆侈  
關機開闔如投匭葭灰養火焚沈水霏微牙吻煙雲起  
提攜愛玩置燕几博山篆鼎詎可比一枰何日刷前恥  
滿軒風月人千里清香一炷愁如洗

客有饋玉面狸者戲賦此詩

山林冬煖草未衰深巖穴處狸正肥丰茸毳毳面粧玉

搖曳脩尾髦如聲夜行晝伏彼何罪失身終墮網與機  
庖厨須爾充口腹幾欲斷尾同犧雞蒸炊包裹付糟滓  
酥香玉軟豐膚肌霜刀縷切膩且滑犀筋厭飫良珍奇  
猩脣熊白不足數披絮黃雀空多脂樽前風味乃如許  
為爾倒盡黃金卮

冬日閒居遣興十首

歲暮碧山中清霜日自濃隱牀吟蟋蟀拂檻老芙蓉風  
月成三友家山夢九龍道人知睡美將曉小鳴鐘

飄泊向江城山居境過清霜深猶竹色風勁更松聲且  
盡杯中物何須身後名擁爐孤笑處寒夜又三更

蘭若富雲松吾生寄此中無心復彈劍有恨但書空白  
菊因霜紫青楓向日紅晚來幽獨甚卧聽竹間風

蕭颯鬢絲垂此懷誰與知驚心傷網繳老眼厭旌旗未  
遂龐公隱空餘宋玉悲故園何處是搔首望天涯

宿雨乍晴天初寒氣颯暄梳頭風滿櫺曝背日臨軒小  
酌無所釀閒眠只舊氍忘心亦忘法作箇是安禪

深炷一爐香孤吟夜正長山虛風落木雲破月窺房老  
驥志千里越禽思故鄉羈栖兩寂寞坐歎鬢毛霜

投老見多難干戈日正深飲河胡馬健破壘漢疆侵大  
將未燕首小臣空越吟龍荒兩宮遠感憤淚盈襟

澤國杳何許鴈書初報安枝間鳥鵲喜原上鸛鵒難松  
菊荒三徑軒裳厭一官黃梁何日熟客夢正邯鄲

衰病寓僧房閒中氣味長盤深饒芋栗地僻懶冠裳坐  
隱烏皮几行攜古錦囊接籬顛倒著不是醉高陽

僻處掩松門知非更念恩庭空從雀啅山暖覺蜂喧木  
葉靜如掃茶花開正繁蕭條歲云暮倚杖自忘言

食蟹

平生最愛梁谿居溪頭紫蟹幾尺餘持矛被甲意頗橫  
霜後直欲陵於菟端然秉炬可攻取束縛健者歸庖厨  
雙螯如臂自可飽蒲腹膏液凝紅酥每傾新釀為一醉  
風味竊疑他所無那知謫墮荒山裏乃有此物供臞儒  
客云來自九江郡分以餉我良勤渠輪囷初喜入盤饌



郭索想見行泥塗西風江岸蘆葦枯下田粳稻香且腴  
朝魁把盞屢蛻殼宜爾怪偉胷中都內黃疏封何足道  
左手相持真可娛流膏斫雪快一嚼不復悵望思東吳

### 食橘

洞庭一夜天雨霜橘林綠苞朝已黃遠題書後三百顆  
入手便覺秋風香黃金為膚白玉瓢沆瀣深貯甘且芳  
雕盤初擘嚙清霧冰齒乍嚼流瓊漿色香氣味紛可喜  
下視衆果皆茫茫余平生愛種此木關梁谿傍只今蒿

艾已埋沒豈敢向日爭熒煌蓬萊雲氣久寂寞漢殿無  
復羅瀟湘厥包縱有盡酸澁剖之蠹朽安足嘗乃知汝  
病是天意坐使玉食無輝光荒山乃爾飫佳品安得驪  
裹置錦堂君不見杜陵野老歌病橘蕭蕭半死誠可傷  
秀容菊

黃菊已槁餘微馥白菊初開疊羅縠秀容丰淡却嫣然  
故伴幽人慰愁獨吾聞此種南陽多千花萬藥爭駢羅  
鬱葱佳氣久蕭瑟悵望菊潭今若何

許崧老見和月林堂夜坐詩復次前韻寄之

宇宙一逆旅安用歸我廬解裝寓僧房衮丈即有餘三  
年走萬里華髮照川途頗思少壯樂談笑輕簪裾醉揮  
鐵如意擊碎紅珊瑚垂老見兵革濟時愧才疎及茲再  
飄零歛若霜中梧幸從山林遊時與釋子俱超然意有  
會不必窺其書臞仙靜退者久要不渝初和我月林篇  
此作久所無徵言思會面歲晚苦離居

周中元賦御畫驄馬次其韻

蓬萊宮殿日月長  
廣廷汎灑如無帚  
臨軒親貌玉花驄  
天驪自出天人手  
驚鴻欲起無羈皂  
如聞朔風動秋草  
奮身驤首舉雙蹄  
意態天然始知巧  
時危反掌同永嘉  
邊騎颯沓陵中華  
當時宸筆散煙霧  
往往流落羣臣家  
雄姿倜儻精權奇  
此畫惟應識者知  
悵望崆峒轉仙仗  
忍傳耆舊把天衣

送周元中遊黃龍山

此身飄泊墮荆蠻  
幸有幽人訪我閒  
得句多從丘壑裏

知音端在笑談間  
青鞋布韉平生事  
野鶴孤雲到處山  
好去黃龍露消息  
直須一箭透三關

題峽江蕭氏思賢堂

堂為李先之設

玉笥峯邊蕭史居  
拂雲松竹散扶疎  
妙年氣節慕前輩  
故老風流空結廬  
幸有江山供一覽  
自應圖史足三餘  
何時海內干戈息  
借我茅齋與著書

黃雀

秋杪江天小雨餘  
卑飛端為網羅湏  
祗應俛啄一粒粟

故使常行萬里途  
愛酒情懷多骨醉  
披綿風度更膚腴  
苞苴宜入金張室  
分餉何為及老夫

陳幾叟以了翁所作默堂箴見示且求余言拾其  
遺意作四絕句

維摩不二門中法  
周廟三緘膺上銘  
莫道寂然無所說  
湏知淵默有雷霆

言默當時俱是智  
可言而默亦非真  
君看王導雖賢者  
不語猶能殺伯仁

言以多窮默取容不如體道守其中道非言默所能載  
畢竟兩端皆是空

鍾鳴谷響孰為然因擊緣聲故有言若會雖言本無說  
從教千偈口淵翻

得報以謫降官不許同處一州自鄂渚移居澧陽  
有感

萍漂梗泛又遷居歎息謀身術已踈願訪湘妃遺珮浦  
試追漢傳弔纍書干戈滿眼傷羣盜松梓連雲念故廬

澤畔行吟覺憔悴前身疑是楚三閭

翁士特見示山字韻詩兩篇復次前韻寄之

未展垂天翼聊尋避地山寶坊資小隱綵服奉慈顏鄉  
邑兵戈滿軒窗紫翠環遙知排遣處祇在倡酬間離索  
嗟時久詩篇喜使還故情尤覺重佳句不容攀灑落吳  
牋濕韜藏古錦斑開緘驚璀璨通耳聽絲蠻陋質塵黃  
閣高材困綠綸青衿同婉孌華髮悵扁攔顧我方遐棄  
如公豈久閒何須歎飄泊吾道屬多艱



踏徧江南土來遊湖外山地卑驚鵬鳥天遠憶龍顏淮  
海屯貔虎戈矛雜珮環馳心萬里外回首五雲間颯沓  
方多故飄零且未還桃源期可問鐵鑱悵難攀霜重丹  
楓落江清錦石斑夢餘驚蟻垤爭極歎蝸蠻且隱重重  
几深藏若若綸江籬紛掩苒湘竹暈徧欄水國鼃鼃橫  
琳宮日月閒親朋未相棄莫使鴈書艱

次韻士特試谷簾泉見懷之作

桑苧嘗來第二泉翠松偃蓋色相鮮谷簾竇乳爭多少

西子南威各自妍

片雲搖曳不勝閒行盡江南處處山  
豈解為霖澤枯槁只思歸隱碧巖間

戊申冬至日有懷諸弟時赴澧陽

緹室初迴律管陽貂裘還是旅殊鄉  
可堪身向三湘遠更覺愁隨一線長  
棣萼相思勞夢寐郊裡成禮想旂裳  
羈臣與國同休戚老眼猶期見治康

張氏二甥寄詩可喜賦此篇以贈之

每見吾甥學不休  
信知積善有源流  
驂駟汗血為駒日  
松柏凌霜出地秋  
努力年華成宅相  
著鞭高躍破煙樓  
渭陽正續離騷賦  
頻寄詩來慰客愁

得梁谿家書報黃氏女生外孫

恠底朝來鵲噪門  
家書遠報女生孫  
須知鍾慶由先德  
故使遺芳衍後昆  
肌骨遙憐凝玉雪  
風光自與茁蘭蓀  
何時歸去親懷抱  
華髮褰衣更覺尊

梁谿集卷二十二

欽定四庫全書卷

梁谿集卷二十三

宋 李綱 撰

詩十九

赴澧陽二十三首赴南海道中及己酉歲作五十七首

自蒲圻臨湘趨岳陽道中作十首

再次韻崧老見和之作

許詩附

岳陽樓三首

鼠須筆二首

渡江

章華臺二首

次韻唐李華序雲母泉

至澧陽寓天寧僧舍二首

深省軒

謫居海南五首

別夾山能老

藥山三詠三首

梁山觀音寺

自武陵舟行至德山

益陽白鹿寺

清修寺二絕

自湘鄉趨邵陽以避謗不敢取道衡嶽有感五

絕

邵陽道中雲巖寺

清湘西山寺無量壽塔

桂林道中二首

山月驛聞子規次韻

道陽朔山水尤奇絕

獻花鋪次壁間韻

象州道中二首

飲修仁茶

自去冬不雨至今道傍井泉竭

次貴州

伏讀三月六日內禪詔

暮春雨中有感

含笑花五首

荔支五首

茉莉二首

得梁谿書寄諸弟

即事三首

移居南山寺寺有巖洞甚幽並葛稚川丹竈

自蒲圻臨湘趨岳陽道中作十首

鄂渚何嘗一日安  
澧陽猶喜遠江干  
帝妃降矣空遺珮  
公子思兮欲採蘭  
水帶瀟湘疑有鴈  
地連嶺蜀苦無寒  
迂疎自笑謀身拙  
却荷朝廷德意寬

屈伸任道復何求  
去國翻成汗漫遊  
處世久師齊物論  
攄懷聊賦畔牢愁  
霜清日薄寒光急  
雲慘天高陰氣浮  
嫋嫋西風洞庭濶  
可堪更上岳陽樓



歲寒又復事南征  
旌櫂蘭舟過洞庭  
水入重湖千里白  
山連平楚數峯青  
雲鴻杳杳飛何遠  
汀芷微微氣自馨  
千古靈均英爽在  
固應笑我學餘醒

三年奔走未容歸  
敝盡東周季子衣  
斷壠連岡平野濶  
扁舟短櫂寸心違  
凌晨白霧霑裳濕  
薄暮彤雲夾日飛  
回首梁谿杳何處  
翠烟空鎖釣魚磯

還驅征騎向三湘  
行盡騷人放逐鄉  
綠葉素榮歌橘頌  
采衣姣服浴蘭湯  
雲中帝子旂旗降  
物外桃源日月長

便欲翛然與高蹈故應脫屣謝軒裳

不解揚波與鋪醕又還來放楚江湄椒蘭氣味何其烈  
蘅藪芬芳空爾為寧赴湘流非我事託懷鵬鳥乃吾師  
醉醒清濁初難共漁父從來自不知

遠謫三湘欲卜居試從詹尹拂占書昂昂願作雲間鶴  
泛泛寧為波底魚咿嚶突梯真得計潔廉正直却成疎  
益堅節操行吾志龜策從來自不如

更欲投書弔汨羅西風嫋嫋水增波江分夢澤於菟遠

地近芳洲杜若多野鳥終年從萃止木奴千樹正婆娑  
卜居更作終焉計華髮蕭蕭奈老何

俎豆其如軍旅何誰令瀚海起干戈休將直道論三黜  
且把微辭續九歌山鬼含顰乘赤豹湘靈解珮鼓雲和  
蠻邦雖陋吾何恨厭見旌旄相盪摩

龍駕翩翩帝子遊我因謫宦亦淹留瀟湘且傍黿鼉窟  
葭菼空懷鸚鵡洲專氣願師周柱史著書更笑陸忠州  
變心從俗吾何敢千古騷人共此愁

翰奉和大觀文相公見寄古風

旃裘亂衣裳風雨飄屋廬南奔萬里空脫死鋒鏑餘翠  
華狩絕域黃塵翳修涂朝無嵇侍中濺血霑誰裾夷兒  
金束袍漉菽懸珊瑚驕氣吞九州投餌術已疎公捐繞  
朝策觀化聊據梧鳳凰渺鴻乙紫氛誰與俱丘壑歲已  
晚鍾鼎功未書棄置委時運超搖遊物初此憂自古有  
此樂絕世無邂逅拯橫流功成吾不居

再次韻崧老見和之作時傳春秋集傳又欲借易

說故篇中及之

黃塵暗中原河洛皆穹廬衣冠競南渡故國靡復餘  
襄陵大嶽裔亦爾困征涂顛沛不忘道呻吟曳長裾如公  
巨川舟豈止清廟瑚愧我正羈束未能踵漢跡幸然聲  
氣同鳴鳳棲必梧褰裳思琢磨道阻不得俱已從借麟  
經更欲窺羲書庶或晚聞道洗心復其初湘沅騷人鄉  
蘭芷今豈無回風搖蕙草歎息空幽居

岳陽樓三首

縹緲層樓俯洞庭湖光霽色兩澄明  
氣蒸雲夢浮天白水合瀟湘到底清  
去櫂來檣雲共影斷鴻孤鶩笛連聲  
望中更覺君山小一點青螺鏡面平

脩然多難偶存身又到蒼茫楚澤濱  
鼓舞魚龍張樂地佩紉蘭茝獨醒人  
涉江哀郢空回首極目傷心欲向春  
鼓枻寅緣傍枯菰故應漁父尚垂綸

常誦飛龍邇洞庭登樓況復把騷經  
瑠璃萬頃天同碧翠黛一螺山更青  
白鳥風高方倦翮蒼鷹冬暖正舒翎

客愁欲作長鯨吸却笑三閭只獨醒

鼠須筆

鼠能為虎亦何功用舍之間繫所逢誰謂有皮為有禮  
翦須猶得管城封

中山毛穎久中書鼠輩胡為亦可俱寢廟穴居真得計  
畏人端恐擢其須

渡江

桂棹蘭旌楚澤東碧空如水水如空江湖落日浮秋橘

島嶼殘霞拂斷虹  
世事茫然煙靄裏  
客愁都在艣聲中  
沙頭鳬鴈相儔侶  
笑我年年逐轉蓬

章華臺

華容縣西三里

斷隴連岡雲夢西  
楚王宮殿尚遺基  
桂花半落垂黃橘  
想見章華九月時

華容西二十許里有墨山  
即離騷所謂玄石也  
山有大雲寺  
寺有雲母泉  
甘芳潔清  
大旱不竭  
唐李華有詩序之  
甚詳其末云  
華貶杭州司公恩



復左補闕次于岳陽江山延望思與高賢共飲  
雲母之泉躬耕墨山之下敢違朝命以詢私欲  
秋風露寒洞庭微波一聞猿聲不覺涕下沉支  
離多病年甫始衰願餌藥扶壽以究無生之學  
事乖志負火爇余心三復其言而悲之因次其

韻

霜風振古林肅肅有異聲我登玄石山適此氛祲清散  
策步山巔僧廬窈而精石磴盡雲母晶熒璫瑤英涓涓

幽谷泉玉色淒芳馨飲者得難老沈疴體皆平乃知泉  
源美本自山川靈沈吟遐叔詩此其浪得名肺腑久塵  
埃於焉吸清泠玉池豔生肥漱濯歸黃庭却思陸子泉  
厥味可弟兄白首困飄泊丹心竟何成鼓枻渡瀟湘曳  
裾拂荆衡回頭故山遠愴恍若為情區區金石堅正賴  
日月明卷舒隨用舍未覺殊虧盈風高洞庭波雲暝蘭  
芷城餌藥扶始衰究心學無生庶幾甫知命寸田不廢  
耕

至澧陽寓天寧僧舍有感

常誦離騷澧有蘭那知謫宦憇其間  
片雲隻鶴風方急只恐飄零過別山

此身又復寓精廬丈室蕭然一物無  
每見招提心即喜前生真是老浮屠

深省軒在丈室之西余為名之

軒檻虛明丈室西叢筠佳木翠陰垂  
遊觀物物皆深省豈在聞鐘欲覺時

見報以言者論六事其五皆靖康往故其一謂資  
囊士人上書以冀復用謫居海南震懼之餘斐  
然有作

力小安能勝萬鈞退藏深渺欲全身大恩不報有餘責  
何必煩言浪指陳

非才自可罷鈞衡百念灰寒豈復萌剛道資囊上書者  
不知誰繼潁川生

尼父乘桴居九夷管寧浮海亦多時古來聖賢猶如此

我泛鯨波豈足悲

功似贊皇猶遠涉  
智如鶴相亦來遊  
世間萬事非人力  
只有安心百不憂

蘇子曾為海上仙  
羣龍三復絕常編  
我今日對義文語  
却恨公書取次傳

別夾山能老

相逢千偈口瀾翻  
已是親曾到夾山  
猿鳥可能知祖意  
飛騰青嶂碧巖間

藥山三詠

問道室

骨相嶄巖心已安  
松林談道不勝寒  
習之不會高人意  
便作天雲鉞水看

伏牛菴

侍者何須召二空  
一元調伏自知風  
軒然棟宇翬飛處  
何似當年茅竹中

雷滿地

英雄割據老漁師習氣難忘鑒此池尚想興酣高會處  
投身下取酒杯時

梁山觀音寺

東漢梁松駐  
軍之地有廟

大士當年白鹿馴寶坊千古閟松筠風流帝堦膏梁客  
也解來為護法神

自武陵舟行至德山

捨車泛蘭舟搖蕩武陵水憇裝古叢林幽勝冠南紀當  
時霹靂手掣電機在捶鈴鎚今得人宗旨振頽委何須

大雄殿突兀踞巍址龍蛇相混雜衲子聚千指齊竽一  
一吹真贗見鑪錘青葱松竹陰積翠紛可喜春風一動  
搖蕭瑟鳴不已却遊德岷亭枉渚抱中沚襄陽今何如  
風物畧如此空懷墮淚碑愧嘆羊叔子坐令鄒湛輩名  
字隨駢尾夷人窺漢疆戰哭多新鬼王室如綴旒寇盜  
結蜂蟻而我荷寬恩抱釁適萬里回頭望中原灑涕濕  
巾几海山渺安在瀕洞鯨波裏飛仙時往來當學長不  
死



益陽白鹿寺

寺枕清江蔭碧梧蕭然景物類東吳登臨忽動思歸興  
不待秋風可鱸鱸

清修寺在益陽數十里間惠遠之弟居之世謂之

小廬山二首

盤紆石磴白雲間風落巖花滿路斑峯嶺橫斜自重掩  
箇中真是小廬山

傍山修竹翠檀欒疎節疎枝碧玉寒安得誅茅此君側

世間渾作夢中看

自湘鄉趨邵陽以避謗不敢取道衡嶽有感五首  
平生性僻愛溪山偶得經行祇為閒歎息迂程避煩嘖  
坐令南嶽阻躋攀

石廩巉天堆祝融遙看山色有無中寬恩異日容歸老  
先到衡陽回鴈峯

恭聞南嶽魏夫人絳節霓旌擁玉輪我欲他年受真訣  
先從碧海滌埃塵

鄴侯奇譎世難知  
放浪衡湘亦避時  
懶瓚不知今在否  
無心更與覓蹲鴟

退之昔謫惡溪濱  
精意能開衡嶽雲  
我匪天窮坐人阨  
試從山外望氛氲

邵陽道中雲巖寺

山空小寺依嵌竇  
日暖幽禽轉好聲  
萬箇琅玕一茅屋  
何當此處寄浮生

清湘西山寺無量壽塔

黃花翠竹真如性  
大地山河清淨身  
欲識今時無量壽  
不知瞻禮是何人

桂林道中二首

桂林山水久聞風  
身世茫然墮此中  
日暮碧雲濃作朶  
春深稚筍翠成叢  
仙家多住朱明洞  
客夢來遊羣玉峯  
鴈蕩武夷何足道  
千巖元是小玲瓏

時危遠謫墮南蠻  
猶在乾坤覆載間  
瘴雨嵐煙殊氣候  
玉簪羅帶巧溪山  
枕柳葉暗傷心  
碧躑躅花開滿目斑

惟有月華依舊好清輝應與照雲鬢

山月驛聞子規次韻

春枕夢回孤館悄世故縈心愁不了山深夜闌子規啼  
殘月滿牕天未曉

道陽朔山水尤奇絕舊傳為天下第一非虛語也  
賦二絕句

溪山此地藹佳名雨洗煙嵐分外青却恨征鞍太匆遽  
無因一上萬雲亭

賦詩曾送謫仙人垂老翻遊到海濱夢幻去來何日了

且將病眼看嶙峋

李泰發謫陽朔令嘗以詩送其行

獻花鋪唐相李德裕謫海南道此有山女獻花因

以名之次壁間韻

我亦乘桴向海涯無人復獻雨中花却愁春夢歸吳越  
茗飲濃斟薄荷芽

象州道中二首

路入春山春日長穿林渡水意徜徉溪環石笋橫舟小

風落林花撲面香  
山鳥不知興廢恨  
巖雲自覺去來忙  
炎荒景物隨時好  
何必深悲瘴癘鄉

竹屋茅簷三四家  
土風漸覺異中華  
碧榕枝弱還生柱  
紅荔春深已著花  
社鷺不巢南候別  
塞鴻無信北音賒  
海山此去猶千里  
會見安期棗似瓜

飲修仁茶

北苑龍團久不嘗  
修仁茗飲亦甘芳  
誇研鬪白工夫拙  
辟瘴消煩氣味長  
江表露芽空絕品  
蜀中仙掌可同行

從容飯罷何為者一椀還兼一炷香

自去冬不雨至今道傍井竭田多不耕有感

匝地風雷空震蕩終宵雲雨竟虛無  
媮閒農具田皆廢  
暵死行人井半枯  
東海愆陽緣孝婦  
桑林謁禱本讒夫  
忠魂昭雪姦邪逐  
坐見為霖萬物蘇

次貴州二首

青楓夾道鷓鴣啼  
古郡荒涼接島夷  
陸績故城依石巖  
葛洪遺竈俯江湄  
光風苒苒吹香草  
煙雨濛濛濕荔枝



欲作終焉卜居計自應痾僂不吾欺

懷澤為邦古鬱林江邊邑屋樹森森山連八桂峯巖秀  
地近重溟霧雨淫歲久承平消瘴癘時危爭戰覺幽深  
試謀十畝膏腴地丹荔青蕉獲我心

伏讀三月六日內禪詔書及傳將士榜檄慨王室  
之艱危憫生靈之塗炭悼前策之不從恨姦回  
之誤國感憤有作聊以述懷四首

憶昔廷諍駐蹕時孤忠欲挽六龍飛萊公謾有親征策

亞父空求骸骨歸靈武中興形勢便江都巡幸士心違  
累臣獨荷三朝眷瘴海徒將血涕揮

鐵騎長驅擾漢疆廟堂高枕失提防關河自昔稱天府  
淮海于今作戰場退避固知非得計威靈何以鎮殊方  
中原夷狄相衰盛聖哲從來只自彊

歎息姦臣術已疎謀身誤國竟何如馬嵬不進楊釗死  
關陝初臨元振除王室威靈嗟索寞蒼生環堵未安居  
荒陬不見中原事望斷東吳一紙書

建炎虛席待經綸  
恩賜宸章寶墨新  
學際天人何敢爾  
忠開金石庶當仁  
孔明得主規模壯  
陸贄離朝謗譴頻  
今日追思慙至意  
御書重執淚盈巾

學窮天人忠貫金石所賜御書語

暮春雨中有感二首

雨細梅黃荔子丹  
殊方風物異江山  
客愁望極傷心處  
更聽鉤輈雲木間

萬物焦枯誰作霖  
片雲成雨慰民心  
姦邪逐去精忠雪  
天意方知感格深

含笑花五首

一去閩山遠玉顏故人相遇有餘歡臨風莞爾綠何事

應笑先生又失官

玉質猶披翡翠裳溫泉浴罷藹天香回眸百媚嫣然處  
羞死三千紅粉粧

竄逐流離老病身天涯相見意相親粲然不用千金買

應記當年作賦人

予在沙陽曾  
作含笑花賦

素淡丰容不自持養成妙質亦多時不知巧倩東風裏

含蓄清香欲待誰

謂之曾詰笑何因只笑明時竄海濱  
晉以志窮萊以直定兼我拙作三人

荔枝五首

海山僊子絳羅襦霧縠中單白玉膚  
知我遠來相勞苦故馳先使迓中途

絳紗囊裏水晶丸偏得楊妃帶笑看  
休道馬嵬當日事只今何處是長安

玉人纖指擘輕紅猶憶恩頒自漢宮  
翠籠藤盤異當日  
蠻烟瘴雨正濛濛

荔子蠻方也自丹不如閩嶺為微酸  
玉盤磊珂三千顆  
猶憶甘芳繞齒寒

百馬崩騰耆舊悲只今戈戟暗江湄  
自知疎拙蒙恩重  
猶得南來食荔枝

茉莉花二首

冷豔幽芳雪不如佳名初見貝多書  
南人渾作尋常看

曾侍君王白玉除

風露扶疎蔓翠藤  
玉花剪刻見層層  
清香夜久偏聞處  
寂寞書生對一燈

得梁谿書寄諸弟二首

一紙書來抵萬金  
天涯慰我念家心  
只今王室猶如此  
回首東吳涕作霖

荔子初丹色半青  
玉膚未滿已芳馨  
欲題書後三千顆  
須待煙林燦若星

即事三首

賓江兩岸水綿飛，負郭家家熟荔枝。  
瘴雨蠻煙已蕭瑟，可堪梅子欲黃時。

荔枝紅紫已交加，龍眼新來又著花。  
便欲謀君不須去，咀冰嚼雪過年華。

森森榕木碧參天，夏日初聞第一蟬。  
美蔭羨君誠得計，何須悽怨噉風前。

移居南山寺，寺有巖洞甚幽，并葛稚川丹竈。



倚山高閣仰觚稜  
洞穴嵌空屐可登  
丹竈舊傳留秘藥  
仙巖今已屬閒僧  
數峯削玉青如髻  
羣木參天翠作層  
小駐未妨幽興發  
野禽嘲弄醉膾騰

梁谿集卷二十三

欽定四庫全書

梁谿集卷二十四

宋 李綱 撰

詩二十

海南及歸自瓊  
管七十二首

伏覩四月五日赦書鑒興反正二首

端午日次鬱林州

恭聞詔書褒悼陳少陽四首

寓鬱林著易傳有感 次雷州

中秋月色佳甚與宗之對酌天寧寺寶華堂

閣提花盛開三絕

得家書報長子儀之房下得孫男

九日懷梁谿諸季二首

贈嶠南琮師

冬至

聞官軍破黎賊作兩絕

次地角場俾宗之設祭伏波廟

次東坡韻二首

次瓊管二首

檳榔

次瓊管後三日奉德音自便二首

郡城北日語海余易之日雲海二首

北歸晝渡風便波平尤覺奇絕成五絕句

歸次海康登平仙亭次萊公韻

雷廟讀丁晉公所作碑

謁寇忠愍祠堂六首 初發雷陽二首

琮師追送至城月驛戲成兩絕句以答其意

立春日龍化道中得家問三首

和東坡醉題四首

假道容惠當遊勾漏等洞天

海上得孔雀六鸚鵡十餘携歸遺童稚輩戲成  
立春後一日風雨殊有寒色

容南道中二首

再賦孔雀鸚鵡二首

陸川道中偶成

古律兩篇答鬱林王守

過北流縣八里遊勾漏觀留五絕

伏覩四月五日赦書鑾輿反正中外大慶小臣有  
感斐然成章二首

天眷吾皇築舊基未應炎德遂中微共欣宸極還天步  
賴有羣龍夾日飛霈澤及民寰海慶孤忠許國寸心違  
建炎首被鉤衡選孤負明恩淚濕衣

誤國姦邪已竄誅天扶黼座正宸居少康一旅時猶在  
高祖三章術未踈必順人心收俊傑自應天意助耘鋤  
累臣海上空回首願浥滄溟洗謗書

端午日次鬱林州

久謫沅湘習楚風靈均千載此心同豈知角黍縈絲日  
却隨蠻煙瘴雨中榕樹間關鸚鵡語藤盤磊砢荔枝紅  
殊方令節多悽感家在東吳東復東

恭聞詔書褒悼陳少陽贈官與一子恩澤賜緡錢  
五十萬感涕四首

哀痛綸言灑帝章賜金贈秩事非常無心聖主如天地  
著意姦臣極虎狼忠血他年應化碧英魂今日已生光



先生憤懣誠昭雪九死南遷豈自傷

祖宗德澤在斯民韋帶精忠不乏人魏闕獻言開帝聽  
匪函爭事觸龍鱗血霑斧越雖因我心在宗祊豈計身  
宿草已深難一慟臨風空有涕霑巾

屢將艷議叩楓宸不為承恩始愛君誰使崔寧論廬祀  
恨無慶忌救朱雲死生一快心應了忠義千年筆有芬  
一介草茅言世務從今不復數劉蕡

平昔初無半面交危言幾辨蓋寬饒幽冥我已慙良友

忠憤君應念本朝故國遙看雲杳杳新阡何處草蕭蕭  
撫孤未遂山濤志誰繼騷人賦大招

寓鬱林著易傳有感

謫來海嶠遠兵戈精義微言得切瑳地入鬱林懷陸績  
桴浮滄海學東坡聖經廣大隨人取衆說紛綸柰若何  
從此梁谿作詩少用心已向六龍多

義文作易仲尼傳究極陰陽本自然妙理欲求須得象  
至言已契可忘筌絕編何啻須三過知命從今加數年

歎息時無邵康節數該今古與誰研

次雷州

華夷圖上看雷州萬里孤城據海陬  
萍跡飄流遽如許  
騷辭擬賦畔牢愁  
滄溟浩蕩煙雲曉  
鼓角淒悲風露秋  
莫笑炎荒地遐僻  
萬安更在海南頭

中秋月色佳甚與宗之對酌天寧寺寶華堂

去年今夕寓通城  
猶有新詩寄弟兄  
一自裘囊來海上  
更無繫帛付鴻征  
禪房酌酒夜方闌  
海月窺人光更清

起舞月中心尚壯乘槎便欲造蓬瀛

所寓天寧方丈後有閣提花數株連月盛開玉雪

可愛悵然有懷成三絕句寄吳元中

未渡鯨波寇盜深中原回首涕成霖  
清愁萬斛無消處  
賴有幽花慰客心

深院無人簾幕垂玉英翠羽燦芳枝  
世間顏色難相似  
晴雪初殘未墮時

冰玉風姿照坐寒炎荒相遇且相寬  
縞衣紵帶平生志

正念幽人尚素冠

得家書報長子儀之房下得孫男殊慰老懷時在  
雷州著易傳適至震卦因名之曰震孫以詩寄  
儀之

天涯遠報茁瓊枝共說鵷雛骨相奇鼻祖從來種桃李  
耳孫自合產蘭芝洊雷名震因觀易他日趨庭使學詩  
無復區區如爾父定須了了勝吾兒書來可想開懷抱  
老去何因與弄持素有龐翁攜隱志未應孤負鹿門期

九日與宗之對酌懷梁谿諸季時菊花猶未結藥  
於藥巢中得茱萸泛酒有饋山果海鮮者多素  
所不識賦詩見意二首

此身飄泊旅天涯九日悽然客念家且把紅醪嘗紫蟹  
何須白髮對黃花藥囊賴有茱萸實茶銚頻煩薄荷芽  
山果海鮮多不識却須傳與壯人誇

父子相隨萬里餘途窮端欲哭楊朱三年客裏逢佳節  
九日罇前念友于海上及秋吟蟋蟀鬢邊何日插茱萸

吾生老矣謀身拙歎息乾坤一腐儒

嶠南僧罕遵戒律況向上事獨琮師隱居湖巖絕  
不至城市超然拔俗聞余來策杖見過與語可  
人知為飽參衲子也詢其所見蓋嘗從長蘆了  
遊了居長蘆聚徒至千五百衆道價籍甚江淮  
間余雖不之識然聲氣相合心期自親嘗辱貽  
問今見琮益知了之門風孤峻真楷老兒孫也  
退處天台琮將浮海訪之因賦詩贈琮且簡了

公異時得歸決須相隨於石橋側可以握手一

笑梁谿居士云

萬里謫官來海嶠眼中衲子見絕少方袍圓頂動成群  
與俗不同祇其表琮師乃是雷陽人徧歷叢林參學飽  
歸來卜築瘴海濱十里湖光巖洞小深居不復踏城市  
宴坐惟知侶猿鳥惠然過我意良勤野鶴孤雲自輕矯  
風姿已含蔬筍氣語論更將藤葛繞黃茅深處見松筠  
使我困箱欲傾倒為親聊復戀幽棲訪舊終須乘漭渺



煩師飛錫過天台為問了公何法了

冬至

殊方又復一陽芽荏苒流年歎物華  
土薄葭灰難測候氣溫桃樹已開  
花雲鴻不到音書斷鯨海無程道里  
賒賴有清心為活計不須爛醉作生  
涯

海南黎人作過據臨臯縣驚劫傍近  
因小留海康十一月望聞官軍破賊  
二十日戒行戲作兩絕句

海上羣黎亦弄兵，征車數月旅山城。  
稽留謫命兢惶甚，正坐緋巾懲沸羹。

沈沈碧海絕津涯，一葉凌波亦快哉。  
假使黑風漂蕩去，不妨乘興訪蓬萊。

次地角場以瘡瘍不果謁伏波廟，俾宗之攝祭期以二十五日渡海。一卜即吉。夜半乘潮解桴，星月燦然，風便波平。詰旦已達瓊管東坡，謂斯遊奇絕，冠平生，非虛語也。作二詩紀之。

威信昭然漢兩公  
舊於青史揖英風  
戈船下瀨勲猷壯  
馬革裹尸心膽雄  
顧我迂踈成遠謫  
賴神正直鑒孤忠  
病軀阻造祠庭下  
幽顯雖殊此意同

夜半乘潮雲海中  
伏波肯借一帆風  
滿天星月光銍碎  
匝海波濤氣象雄  
大舶憑陵真莽渺  
寸心感格在精忠  
老坡去後何人繼  
竒絕斯遊只我同

次東坡韻二首

地角潮來未五更  
陰雲解駁作霜晴  
星河明潤天容睟

風浪喧飀海氣清粗見鯢鵬潛化理豈無犬馬戀軒聲  
遠遊不作乘桴計虛號男兒過此生

海上傳呼夜報更舟師歡喜得新晴風帆擘浪去時急  
海月籠雲分外清天影合中觀妙色潮波迴處悟圓聲  
從來渤海為全體試問一漚何處生

南渡次瓊管江山風物與海北不殊民居皆在檳  
榔木間黎人出市交易蠻衣椎髻語音兜離不  
可曉也因詢萬安相去猶五百里僻陋尤甚黃

茅中草屋二百餘家資生之具一切無有道由  
生黎峒山往往剽劫行者必自文昌縣泛海得  
便風三日可達艱難至此不勝慨然賦詩二首  
紀土風志懷抱也

巨舶浮于海長颶送短蓬夜潮和月白曉日跳波紅雲  
影搖脩浪瀾光接遠空喜過三河流愁遠冠頭峯雷化  
迷天際瓊儋入望中地遙橫一線山露點羣鴻偶脫鯨  
鯢患尤欣氣俗同川原驚老眼稚耆看衰翁蠻市蝦魚

合賓居棟宇雄人煙未寥落竹樹自葱蘢碧暗檳榔葉  
香移薄荷叢金花翔孔雀綵幕問黎童南極冬猶暖中  
原信不通管寧雖跡遠阮籍已途窮潁洞滄波裏蒼茫  
返照東客愁渾不寢鼓角五更風

又

四郡環黎母窮愁最萬安峒氓能憫寇瀧吏豈欺韓草  
屋叢篁裏孤城瘴海端民居纔百數道里尚艱難徑陸  
憂生蚤乘桴畏怒瀾颶風能破膽癘氣必摧肝去死垂

垂近資生物物殫舶來方得米牢罄或無餐樹芋充嘉  
饌麤贏薦淺盤萋藤茶更苦淡水酒仍酸黎戶花縵服  
儒生椰子冠檳榔資一醉吉貝不知寒何必從詹尹無  
因詠考槃失圖嗟罪大得此荷恩寬顧影同三友談空  
不二觀中州杳何在猶共月團圓

檳榔

踈林蒼海上結實已累累煙濕潁虬卵風搖翠羽旗飛  
翔金鷺鷥掩映籜龍兒蒨落哈椰子勻圓訝荔支當茶

銷瘴速如酒醉人遲萋葉偏相稱羸灰亦謾為午餐顏  
愧渥頻嚼齒愁疲飲啄隨風土端憂化島夷

次瓊管後三日忽奉德音恩許自便感涕之餘賦

詩見志

此身飄墮到滄溟誰謂君王念賈生黃祇再蒙題姓字  
丹書特為削刑名山林老去何其幸萍梗追思却自驚  
天地恩寬難報德試從今日數歸程

行年舊說似東坡鯨海于今亦再過儋耳三年時已久



瓊山十日幸尤多卻收老眼來觀國尚冀中原早戢戈  
病廢不堪當世用感恩惟有涕霑霑

郡城南曰瓊臺北曰語海余易之曰雲海登眺有

感

孤城南面敞瓊臺千里川原指顧開試向綠雲深處望  
海山浮動見蓬萊

古來雲海浩茫茫北望悽然欲斷腸不得中州近消息  
六龍何處駐東皇

北歸晝渡海風便波平尤覺奇絕成五絕句

澄波不動琉璃滑一望應須萬里餘  
舟行衝激浪花碎如馭白雲遊碧虛

去得南風來北風神靈只在指呼中  
老坡有語舊曾記信我人阨非天窮

來時風浪夜喧驚歸去潮波枕席平  
非是波神有分別故教清晝看寰瀛

纖雲肆卷日方中海色天光上下同  
身在琉璃光合裏

碧空涵水水涵空

平生奔走畏江湖暮齒來乘海上桴自哂井蛙真見小  
望洋向若一廬胡

歸次海康登平仙亭次萊公韵

碧海瞰危亭波光混大清曠懷知樂此夷險本來平

雷廟讀丁晉公所作碑

巨卵曾因霹靂開海邦從此得名雷只知寇老曾遷此  
作記何緣丁令來

謁寇忠愍祠堂六首

親征決策幸澶淵  
南北觀盟有本原  
丞相萊公功第一  
猶將孤注作讒言

一幸江南一蜀中  
奮然廷議叱羣公  
攬回天步雖良策  
元是真皇聽納功

南陽廟坐致云云  
賴有嘉言為解紛  
歎息今人不如古  
久無慶忌救朱雲

平生愛看柘枝舞  
賓燕多餘密炬堆  
富貴在公真末事

誰云緣此故南來

海邦去海只十里山路過山應萬重詩識告人元已久  
未應馬援坐梁松

鑿井得泉今尚美掛錢插竹後成林精忠感動無情物  
不解潛銷讒妬心

初發雷陽有感二首

夢中曾過鬼門關敢冀君恩聽北還父子相隨幸良厚  
僕奴半死涕空潛風煙蕭瑟黃茅瘴山路崎嶇赤腳蠻

歸去梁谿見桑梓定拋冠佩老巖間

餘生幸爾脫垂涎難助安能拒老拳萬里得歸辭瘴海  
三年奔命厭征軒採薇散髮嵇中散開竈燒丹葛稚川  
此去山林如脫兔這回且結好因緣

琮師送至城月驛戲成兩絕句以荅其意

衲子來參去不辭何勞飛錫遠相追贈師銀布牢收取  
便是金襴付囑時

好住湖巖攝此心有緣終會有知音梁谿老去孤峯頂

月白風清難更尋

立春日龍化道中得家問諸季已挈家渡浙江如  
劍川又聞江西頗有羣盜嘯聚遂決意由五羊  
趨循惠潮陽假道閩中以歸偶成三篇時十二  
月十九日

東君又換一年春迎我來從瘴海濱已覺山川有佳氣  
更詢道路得通津欲尋勾漏丹砂令與訪羅浮紫府人  
清夢相符緣契合便須脫屣謝埃塵

遠信來時嶺嶠春  
浮家已在浙江濱  
更傳贛水方虞寇  
須向閩山與問津  
萬里歸來尋樂土  
千巖好去作閒人  
干戈未息中原暗  
悵望關河戎馬塵

川途奔走四回春  
海上經年與死濱  
子美自憐常作客  
長沮應笑是知津  
艱危至死無千古  
憂患如吾豈兩人  
往返循環真磨蟻  
已將大地等微塵

久不飲酒春日得家問喜甚與宗之對酌調馬驛  
中速飲數觥徑醉醉中和東坡醉題四首



海嶠無佳釀經時不入唇巨觥今一醉遠問到初春偶  
脫長鯨口來尋仲子鄰醉中輕萬里始信濁醪神

畏病不舉盃延客祇烹茗浩然雲海間不醉亦不醒偶  
蒙雨露恩漸脫瘴癘境麴生粗可人相對聊醅酌

久客殊念家歸途渺江漢是身如浮雲罹此無窮患今  
夕定何夕一酌千憂散從茲日曛酣此意君莫間

飲少輒大醉醉中識其真天地一秋毫况此渺然身歸  
休巖穴間坐閱萬態新去去勿復道時清為幸民

寓瓊山遠華館一夕夢遊山間小堂松竹環合有  
道士坐堂上誦李太白送人遊桃源序中有良  
田名池竹果森然三十六洞別為一天之語覺  
而異之今假道容惠當遊勾漏都嶠白石羅浮  
皆洞天也豈神者先告將有所遇耶賦詩以紀  
之

神清遂仙遊境寂恣遐躅羽人入我夢軒戶靄松竹萬  
吟謫仙文逸韻響金玉覺來殘燈熒倘恍猶在目歸途

厯容惠問津非素卜將遊四洞天就彼白雲宿豈無葛稚川妙論資灌沃試求龍虎丹一使鬢毛綠斯言儻可珍長揖謝浮俗却笑昌黎翁強項寧詰曲

海上得孔雀六鸚鵡十餘攜歸遺童稚輩戲成二

絕句

鳳友鸞朋出海邦金花翠尾爛文章梁谿臺紹今何似歸伴胎僊取次翔

綠衣紺趾已能飛學語交交未轉時不是蓬萊花鳥使

攜歸聊與調羣兒

立春後一日風雨殊有寒色偶成

竟夕北風號春回雨已膏歸程離海嶠舊服理綈袍宿瘴須寒壓清愁欲醉逃何當入江浙雪片灑鷲毛

容南道中二首

路入容南境風煙自一方山空雲冉冉春動水茫茫紫府丹砂秘幽村碧樹芳肅然有佳致作箇是炎荒

聞說容南久安知客路經沉沉洞天近湛湛古湫渟日

落峯巒翠春回草木青丹砂如可問當卜老巖扃

再賦孔雀鸚鵡二首

孔雀來從海上村參差脩尾燦金文素知肅穆鸞凰侶  
不是喧卑雞鶩羣玄圃赤霄雖有志碧梧翠竹正須君  
攜持萬里歸吳越悵望海山深處雲

學語鸚鵡羽漸成掌中取食絕猜驚籠寬得遂朋從志  
春曉初聞客到聲賦就禰衡文不點杓隨李白飲如鯨  
遠攜休歎殊方去我亦隨緣得此生

陸川道中偶成

嶠南江北本來同往返紛紛一夢中  
舊事銷磨那復有新愁繚繞亦成空  
天邊山色浮濃翠溪上雲光拂淡紅  
我把浮生如夢看雲山元是小屏風

南遷道鬱林郡守王君示古律詩一篇北歸輒成  
兩篇以荅其意

山圍古郡碧周遭陸績衣冠雅自褒  
海上來歸懷麈尾鬢間空歎長霜毛  
易書顧我耽成癖詩筆憐君老更豪

此去龍城幸非遠不須巨石壓雲濤

垂老相逢海嶠間盈編珠玉破愁顏清名豈藉鬱林石  
雅志常存仙奕山丘壑採薇嗟我病絃歌為政羨君閒  
中原杳杳旌旗暗回首春風涕一潸

過北流縣八里遊勾漏觀留五絕句

百里仙山氣象雄參差峯岫翠成叢雲駢鶴馭今何處  
丹竈依然洞穴中

葛翁求令為丹砂今我來從海上槎祗恐山靈嫌俗駕

未容歸客卧煙霞

羽人相導把霓旌窈窕松林露氣清不用逢迎同貴客  
暫來花院聽棋聲

避諂多時不到山忽驚身在洞天間北歸更覺君恩重  
得遂清遊一解顏

洞戶沉沉別有天玉樓珠殿鎖霏煙如何祠館人間世  
破屋荒涼紫府前

梁谿集卷二十四



欽定四庫全書

集部

梁谿集卷二十五至

詳校官庶吉士<sub>臣</sub>張溥

侍讀<sub>臣</sub>孫球覆勘

總校官知縣<sub>臣</sub>楊懋珩

校對官中書<sub>臣</sub>潘奕雋

謄錄監生<sub>臣</sub>陳太初

欽定四庫全書

梁谿集卷二十五

宋 李綱 撰

詩二十一

歸途庚戌歲  
作五十七首

道勾漏山靈寶觀竊覩兩朝御書謹成古風

次山堂

聞長沙軍變向伯恭能彈治

蕭茂德自臨江遣人致書

虞祖道相從湖海

除夜與宗之對酌懷家

庚戌正月一日遊都嶠留五絕

宿都嶠山靈景寺

容南鼎新郡庠所建講堂名之曰育材

潯守李侯以所蓄法書十軸相示題卷末

清明日得家書四首

容南初食荔枝

恭聞駐蹕浙東王師屢捷

趨藤山古風

藤山路古松為取松明者所剗剔

鐔津江閣

同曹使君登浮金堂

月夜江閣次東坡韻

晚泊蒼梧有感

封川贈李致遠郎中

泊晉康橫翠亭二首

同陳使君登香寺豁亭

客有出示御製登中和堂詩小臣斐然仰次宸

韻二首

江行即事八首

玉乳巖

五龍廟五絕

江上晚景二首

遣興二首

次肇慶府有感

端石硯

蚊

出峽

靈洲寺次東坡韻

次韻鑒空閣

道勾漏山靈寶觀竊覩兩朝御書謹成古風

抱疴卧雲海夙夕負深恐寬恩聽旋歸何啻丘嶽重問  
津勾漏山散策寶圭洞羣峯羅翠屏環合無缺空遊仙  
契初心幽賞協清夢却來觀宸章寶氣騰端竦真行雜  
草隸筆勢極翔動大小飛白書飄灑縈舞鳳恭惟睿智  
姿多能本天縱妙蹟藏名山俾與萬世共林壑增炳燠  
神物勞護擁惜無深巖屋陰覆示崇奉何當鳩良材為  
葺傾壓棟天弧不指狼中原戎馬閑九廟未奠居臣子  
銜憤痛豈知炎荒中奎畫得瞻諷至哉博大言粟麥因

異種天常及諸佛一一資妙供

飛白有有罪有福種麥無粟聞善但行砂中有

玉及供養諸天帝十方佛之語

竊於翰藻間窺見神心用源流此中來

基本中興宋稽首歸琅函斐然成善頌

元結嘗經畧容管王守作次山堂以思其人為賦

此詩

華堂高敞為思元善政相望數百年冊府聲名秀羣玉  
海邦巖洞有參天漫郎去久風流在病客來臨道里邇  
聖主中興誰作頌願觀老手筆如椽

客有言長沙軍變向伯恭能彈治規畫甚偉適得  
伯恭書亦道其事作韻語以寄之

長沙舞袖僅可旋今作巨鎮湖湘邊驕兵夜探赤白丸  
乘間竊發將嘯翾不知向子有老拳縛束健卒祇數言  
翩如鳥雀擒鷹鷂姦胥兇領汙龍泉彈壓一境敢復喧  
稚耄鼓舞喜欲顛歸哺其飴甘晏眠衆服壯畧稱無前  
我歸自南得之傳頗欣祖生先着鞭何不付與大將權  
旂旗繽紛指雲燕一鼓士氣如突煙寇羣破膽心少悛



洒掃海內清戈鋌使我衰病安廬田

蕭懋德秀才自臨江遣人致書海上遇於歸途賦

詩寄之二首

三黜先生今得歸更攜稚子訪慈幃病牛卧壠心衰矣  
脫兔投林天憫之萬里往來環轉蟻一生謗譽舌揚箕  
著書欲赴當時約須待江南事定時

踰年海上久安居多謝蕭郎遠寄書不向去來生一念  
已將天地作吾廬中洲杳杳旌旗暗暮景駸駸齒髮踈

準擬峽江成小隱茅齋借我定何如

罪謫海上中州親故罕通問獨虞君祖道相從湖

海踰年北歸同途次容南賦詩識別

飽經憂患莫如吾暮景餘生寄一桴獨子相從來瘴海

豈知還得共歸途應觀天下奇男子解笑人間淺丈夫

老去山林養衰疾好音時與繫飛鳧

計松老聞虞君同泛海以書語人曰

此天下奇男子也因全用其語淺丈夫聊取的對耳

除夜與宗之對酌懷家

四年除夕旅殊方海上歸來路更長暮景飛騰催老病  
餘生留滯且炎荒傳聞寇盜紛驚擾歎息江湖墮渺茫  
杳杳東吳家萬里椒盤誰與頌馨香

庚戌正月一日遊都嶠山留五絕句栖真觀中

元日尋真到洞天溪邊春色已嫣然落花流水人間去  
誰道桃源不是仙

松嶺雲峯步步佳芒鞋竹杖極幽遐使君不得同清賞  
正恐山將翠幕遮

遠目增明都嶠山丹梯況得遂躋攀乃知猿鶴真心在  
乘服軒裳祗強顏

疊葉高巖聳八峯雲間紫翠鬱相重故應洞穴通勾漏  
更愛林巒接大容

石磴盤紆木橋葱捫羅獨上最高峯白雲深處時回首  
千里江山指顧中

宿都嶠山靈景寺

清晨遊栖真薄暮宿靈景山空松桂香雲細泉石冷高

崖敞飛簷象緯逼參井惜無娟娟月散此林下影夜闌  
風露寒巖曲燈耿耿踈鐘響嵌竇客枕發深省却隨猿  
鳥起再上翠微頂道人山後來眸子頗清炯試詢龍虎  
訣妙意默已領我生憂患餘半世泛萍梗脫身鯨海中  
掃跡方自屏願從稚川遊薪水事丹鼎庶資刀圭力少  
使桑榆永黃塵暗中原靜謐惟五嶺渺然炎荒地自絕  
羽書警結茅定前緣幽夢先異境上下三洞間安得田  
二頃攜家學龐公捫虱笑王猛採薇與散髮此志久已

肯嵇生非吾徒幽憤醉方醒

自學校之制廢而戎馬之患興州縣長民者不復  
以教育為意獨容南鼎新郡庠招徠生徒絃誦  
之聲不輟誠可嘉歎所建講堂為名之曰育材  
輒成五言十韻

治世崇儒術庠庠屬臨自從馳羽檄誰復念青衿賢  
守來南紀宏規肇泮林飛輦開講廡鼓篋拂書蟬采藻  
繡江水仰高都嶠岑潛消戎馬氣初習雅歌音洙泗道

非遠張姜賢至今

張九齡姜公輔賢相皆嶺表人

栽培成楚梓追琢見

南金常袞閩風變文翁蜀化深願言遊學者勉副育材

心

潯守李侯以所蓄法書十軸相示題卷末

承平文物何富哉寶章萬笈藏蓬萊餘篇散落士夫手  
名筆往往牙籤排連年戎馬擾河洛錦標玉軸隨飛埃  
李侯好事不忍棄萬里艱棘攜南來炎荒相遇一笑祭  
出以示我逾瓊瑰歐虞顏柳邈已遠蘭亭况復昭陵埋

空遺妙蹟刻琬琰不若古楮存煙煤君謨近世稱第一  
筆力與古肩相挨醉翁工夫不在字名望自足尊輿臺  
芙蓉僊人有典則滄浪逐客氣不衰胷中磊落難屈折  
故使心畫竒而貌東坡行書騁姿媚山谷草聖窮縈迴  
二公文翰照千古俯視凡馬皆駑駘米顛碌碌不足數  
運筆尚有從橫才邇來非是無點畫追時取好如俳諧  
陸書楷法雖小學古人用意何其能君看篆籀寫韻語  
精巧豈易容追陪今人萬事不如古矧以毫墨爭雄魁



嗟余病廢卧都嶠何上我馬云虺虺感時撫事百憂集  
對案不復能持杯明牕展卷慰岑寂坐遷舊觀雙眸開  
梁谿書室插架處念遠更覺增馳懷世間雅好無出此  
絕勝寶玩琴藏雷于今此物未易得願言什襲傳雲來

清明日得家書四首

去國三年久離家萬里餘豈知戎馬際仍得棣華書金  
鼓震南國松筠懷故廬寰區端若此天意竟何如

南荒炎瘴地槐火又清明海嶠無春色江湖有戰聲繁

書來鴈足歸思羨鵬程欲挽天河水滂沱洗甲兵  
欲歸歸未得留滯綉江濱感慨傷春望僑居多北人蒼  
生未蘇息黃屋尚蒙塵王室艱危極潛然泣老臣

煙嵐飛翠蓋鯨海泛龍舟退避亦已遠憑陵殊未休包  
胥思慟哭曹劌願深謀歎息繞朝策何人知故侯

容南初食荔枝二首

海山荔子冠炎荒頗恨遄歸不得嘗猶喜容南三月裏  
輕紅初擘一枝香

買地城南種荔枝每留核付守園兒但祈四海兵戈息  
會見開花著子時

三月二十三日德音至容南恭聞駐蹕浙東王師  
屢捷寇騎遠遁是日得諸季書挈家寓饒之德  
興幸免驚擾忻忭之餘輒成口號

紫泥黃耳到同時家國無虞慰所思飲馬天驕歸朔漠  
安巢越鳥返南枝休祥允協靈基卜喜事何因乾鵲知  
便可理裝尋去路攜家深赴鹿門期

三月朔旦卜靈棋占國得惡銷卦辭曰日出東隅  
炎炎赫赫雖有妖氣反見熏炙羣賢破陰禍難  
解釋占家得克強卦其辭曰去我寶珠乃在天  
衢不意盜者隱匿所居賴得玄鳥為我逐驅風  
靜波息還復我廬至是而驗將得家書鵲聲甚  
厲故云

四月六日離容南陸行趨藤山路崎嶇然夾道皆  
松陰山俺田家景物類閩中殊可喜也賦古風

一篇

孟夏草木長清陰散扶疎蔥蘢竹樹間石磴蟠紫紆嗟  
我事行役彌年困征途及茲理歸鞍敢復論崎嶇深谷  
四無景高巖倚天衢稍從平川行遂得田家居籬落靜  
窈窕桑麻鬱紛敷新秧綠映水鷄犬鳴相呼中原暗鋒  
鏑邊騎方長驅此豈桃花源幽深了如無逝將適閩嶺  
買田自耕鋤結廬亂山中聊以全妻孥

自容趨藤山路古松皆合抱百餘尺枝葉扶疎行

人庇賴為取松明者所剗剔因而摧傾十已六  
七良可惜也

松林繚峻嶺百尺森怒青不知何年種天矯亂龍形濃  
陰翳修途當暑有餘清長風一披拂時作波濤聲如何  
錐刀徒使爭爍火明傷膚及肌骨風雨因摧傾顛倒委  
榛棘氣象猶崢嶸行人失庇賴佇立空凝情緬想栽培  
初愛護如目睛合抱始毫末幾經霜露零一日毀有餘  
百年養不成忍使易凋喪此理真難評憶昔陶士行為

政有善經擢禾與移柳一一糾以刑既往不及追將來  
猶可懲感動遂成章庶幾知者聽

鐔津江閣氣象清曠有閩浙之風偶成長句

斷雲飛雨晚蒼茫靈閣臨流分外涼散髮披襟嘗荔子  
踈簾清簟看魚航三年奔走環循蟻萬里歸來鬢滿霜  
未到江湖先到此風流誰道在炎荒

同曹使君登浮金堂

繞堂松竹散扶踈枕帶江山美有餘神物化龍同劍浦

雙溪成字類桐廬朝雲夜月隨時好  
栖鶯飛鷗迴自如  
茗飲相從得清賞坐令勝事踵蘇徐

月夜江閣次東坡韻

江水如練帶江石如馬肝雙流會合處  
感作蛟龍蟠我  
來暑氣初驟雨成驚湍雲收暮山出  
秀色屏中看缺月  
掛木末光輝溢清寒冷然適我心  
遇境隨所安夜久轉  
寥閒高松露華溥獨坐念平生  
行路真漫漫危腸易感  
激不待聞哀彈猶欣碧川漲  
沒盡風雷灘



晚泊蒼梧有感

常誦蒼梧雲正愁豈知理櫂此間遊  
火山冰井舊傳有桂水藤江相合流  
念遠心如嘶北馬踰年行徧嶠南州  
重華一去不復返悵望九疑空白頭

封川贈李致遠郎中

一別都門十載餘相逢應笑尚迂愚  
綈袍戀戀故人意風雨瀟瀟君子儒  
顧我憂危宜白髮如公收豫亦清癯  
年來頗得義書旨試讀一篇還是無

泊晉康橫翠亭愛其山水秀麗斐然有作二首

上主䟽封地中興啟帝圖江山連肇慶雲物接蒼梧秀  
氣蟠南極神功本禹謨邦人榮望意開府映畚禺

環抱大江流層巒翠靄浮神明扶王氣文物冠南州來  
值炎蒸日去翻風雨秋登高望不極暮角起城樓

同陳使君登香山寺豁亭

渺渺煙波疊疊山玉簪羅帶自迴還雨餘嵐翠濃如滴  
地險江流巧轉灣蟠磴過臨飛鳥上岸中聊與白雲閒

嶠南有此佳山水盡在賢侯几案間

客有出示御製登中和堂詩小臣斐然仰次宸韻

二首

黃屋狩吳越勾陳俯江津迢遙八駿御時邁慰斯民漢  
祚歟再興周邦命惟新誰令玃狁熾坐使宵旰勤宅洛  
既得卜去幽亦惟仁宸章蹟禹功道繼胼胝身期運有  
泰否鈍螭利則伸君王自神武安得熊羆臣

賤子志丘壑敢懷要路津偶乘風雲會冀拯凋瘵民誤

被聖主知坐期功業新飄零繼三黜奔走亦已勤生還  
鯨海中仰荷皇天仁不然鑠金口何有鴻毛身當從玄  
豹隱無復尺蠖伸感歎魏公言願使為良臣

江行即事八首

千里江山圖畫中嶠南浙右豈殊風煙浮嵐彩重重碧  
日染波光灑灑紅蟻釀蟹螯情不淺筆牀茶竈興相同  
扁舟入手吾何事歸去梁谿作釣翁

五月炎方氣鬱蒸安流鼓櫂水風清江魚入饌有餘美

山果滿盤難強名醉裏謳吟聊自適夢中來往本無驚  
廟堂早定安邊策遂我山林幽遯情

置散徒懷報國心還家欣得故園音鉤輦曉岸雲林密  
款乃暮江煙水深壯志已同灰地冷班毛從使雪霜侵  
卧龍只合耕南畝抱膝空為梁甫吟

蒼梧雲物曉淒涼錦石江山一帶長雨浥峯巒添黛翠  
風吹草木送天香魚樵閒話無千古金鼓喧聲震萬方  
我欲誅茅寄幽僻却愁煙水日茫茫

數郡崎嶇山海間只今多事覺寬閒  
衣冠避地成僑寓風月留人長往還  
蘸水藤花方爛熳生雲錦石自爛端  
平生有意五湖去誰謂扁舟行百蠻

合踏青山轉碧川雨餘風月更嬋娟  
光鉉影渡星河碎片段氣蒸雲物鮮  
心繫鷁原千里外夢回鼓角五更前  
翠華杳杳今何處悵望東吳空惘然

峽束滄江暮靄昏孤猿吟嘯不堪聞  
寥寥夜闌波沉月漠漠曉晴山出雲  
釣艇得魚猶撥刺綸巾漉酒任酣醺

年來與物忘機甚自覺沙鷗不亂羣

自晉康順流六十里有山巉然臨江下有巖洞可  
容千人軒豁平坦景幽邃石罅間滴泉厥味甘  
冽因之目曰玉乳巖賦詩以紀其事

鼓枻下端溪停橈登截薛呀然巖洞開儼若棟宇設千  
夫可還揖放步靡凹凸玲瓏四壁間一一幢旆列誰令  
胚渾初凝結有罅缺當年補天手不顧山石裂鐫鏤餘  
舊痕瑣碎委環玦五峯近龍淵無乃通貝闕試求玉函

書何異探禹穴涓涓乳泉滴燦燦冰玉潔清聲落巖竇  
自中琴筑節嘗之味甘芳滌我肺腑熱瓊漿笑裴航石  
髓謝王烈嶠南瘴癘鄉有此雲腴冽青葱松桂陰景物  
助幽絕豈無會心人來遊共旌別題詩製佳名聊以紀  
歲月碧落遙相望千里未磨滅

端康之間地名越城五山秀峙有蜿蜒飛躍之狀  
山有五龍廟當秦時神媪臨江五龍從之遊沒  
葵山上廟祀至今靈響甚著鄉人以風雨候龍



之歸因作送迎辭五絕句以遺之

風雨蕭蕭雲氣浮五龍歸覲到靈湫  
星霜換易江山在尚憶當年水際遊

五山秀峙若飛騰下有澄潭百丈清  
不用燃犀窺秘怪從來神理惡分明

萬霰千霆霹靂飛潛藏神用濟烝黎  
何須簫鼓祈膏澤肯為鄉人有所私

貝闕珠宮不可尋時因風雨聽清吟  
葉公好畫真龍出

却恨今無好畫心

日染波光紅灑灑風搖影裏碧鱗鱗  
神靈來去初無跡  
多少江頭求福人

江上晚景二首

清江一曲深翠岫千峯峙江村八九家  
茅舍修竹裏沙頭漁網懸林表煙素起  
焉得惠崇師寫此真山水  
風雨逐雲急斷霓明飲川江頭日欲暮  
返照青林顛鷗鷺自儔侶蒹葭相接連  
平生江海志對此却茫然

遣興二首

繚絡奔馳不記年，脫身瘴海豈徒然。  
昂藏鶴髮老道士，爛熳醉吟狂謫仙。  
剩把詩篇收景物，何須鑪鼎煮山川。  
平生出處吾無愧，禍福死生皆付天。

海上歸來心緒多，鬢邊無那白標何。  
詩情粗得江山助，酒量自因風月多。  
黃卷中間籠聖哲，白雲深處避干戈。  
弟兄念我心應切，故向梅花嶺上過。

次肇慶府有感

仁德如天覆萬方誰知變故起非常祇因燕地開邊隙  
故使中原作戰場侯景南侵幽武帝祿山西犯走明皇  
運遭九六人徒爾險失山河事巨量一自鑒興遊朔漠  
空餘藩邸在炎荒微臣弭擢增悲感雪涕無因問彼蒼

端石硯

端溪出硯材最貴下巖石珍物乃卵生孕此馬肝色世  
傳鵠鵠眼通透蓋其脉頗同阮步兵見客作青白我來  
巖中遊幽探偶有獲溫然一片玉秀潤滿書宅斷成蛟

龍池澁滑宜筆墨當觀管城翁沐髮散簡策嗟余好陶  
紅收拾積珪璧得此餘可忘一生能幾屐

蚊

江風蕭蕭江水清飛蚊撲撲何處生駝肩豹脚嘴如鐵  
天使哂食同蠅蟲先生暑困汗翻雨僮僕搖扇疲屢更  
乘虛投隙肆毒吻鼓翅鼓足何其輕須臾含桃變柳絮  
坐使饑腹成膨脝捨身施汝豈吾惜逼耳是惡聲嬌獐  
有時緣闕拊吾指罪雖應爾心則矜露華清泚自可飲

戒汝慎勿貪芳腥

出峽

出峽日將暮綺霞連水明山遙欣野濶海近覺江平稍  
稍洲渚轉霏霏煙靄生舟人喜風便時發櫂謳聲

靈洲寺次東坡韻

迴廊小殿枕崔嵬接武東坡我復來江色蒼茫山聳秀  
蔚藍天影抱瓊臺

次韻鑿空閣

東坡謫仙人遊此江海境賦詩鑿空閣如以鏡寫影我  
來遙相望荏苒歲月永讀翁閣上詩宛若相像鏡平生  
憂患餘宵次徒耿耿脫身鯨波間遠跡方自屏泊舟值  
炎蒸風雨變清冷佳哉幽深地自絕鋒鏑警願為劍藏  
神不作錐露穎携家隱山林屬意在閩嶺

梁谿集卷二十五